

YUDAKONO LETA

EBETE NANITABOKOBI

MIDIPIATAMO OSIYODILIYA

¹ Na Yudatela, Ya:su Kelisokono wokodawa idila ega:walo Ya:imesikono ekawila.

La: nanitabokobi midipi Nabiwi Godote dopamo deka:la:mitiyala, iyo, ebete la: kebe epo nilakapolo kemalagidiloletana ega:walo Ya:su Kelisokono itakeamida magumulo dilukuliawenama, na me leta la:tamo palibomo.^a

² Ebema: modobola milo tanalo ega:walo lumagitamo kuba wiya ikamea: tanalo ega:walo nilakapo kimalagidilo tanalo, me netewa-kapiya tanalate la:godolo kawonomamo na:pola:nama:na:.

Godote Kuba Osiyodilolepiatamo Wiya Ikalame Tanalo

³⁻⁴ Naimano wadewade namutupiala:, ale Godogodone kapimiya delawiyama:, na dopamo ebe igilo mula: tanaloma: leta magumulo kiyawaoma: wagelimo. Wiyasiya me tetelo woki idite natamo a:pi, mabu nale me tanalo olowimo, Godokono ubi tanalamo tudila:oa: dubate la:imano taneba magumamo diya gabodo a:popila:iya. Ebe mabuma: na ubila me tanalo ida:mo la: ma kunu kowalubilitama:, Godote a ebeno epatamo dikaeamiya, modobola la: ebe nanitabokobi midi tanaloma: elawonomamo na:gowelanakiyala:.

Numa:la:, ebakobako dubate Godokono nilakapo awokalimino tabo iyakobi midite negelanaka, lumagite kuba dosiyodilomene Godote wiya a:kikaemene mabu ebeno nilakapo kawonomola, ega:walo iba:te na:kegelana Ya:su Kelisoko nani igilo mula:dawa:. Eiye, ebe kapiya ebe aimano nani Watodawala ega:walo Kawodawala, ebema: ibino kuba mabuma: Godokono Buka tabote iyalo tetenomolo egiya, walone

^a 1 Ma:t 13:55

iba:te ibino temeteme wiya nanitabolo kelaema:na:^b ⁵Iyo, Godote kuba osiyodilolepiatamo wiya dikalaemene, la: ebe tanalo dopamo iyatawaiyamata, wiyasiya na ubila kebe olalati tanalote Godokono Isalaela epatamo demaigiyi, la: me tanalo walo na:kemalagidilala:. Numa:la:, Godote ibino igilo mula:lelamelo Isipiti opone ibi dowagailiya, walogabo apune epetapi iba:te ebe nanitabokobi ka:midiya:, ebema: ebete ibi gito anakapulamiya.^c ⁶Ega:walo me tanalo idi na:kuma:la:, wagilimi mabune Unu Duliayomolono nopopi epetapiate ibino wade ilukuli duiyomolo atepate Godotamo gowelao tanalo ebo wagilimiya. Ebe mabuma: Godote ibi teteoa: auli ala:mo matuolamolete idoko magumamo gito iyalekiya, iba:te ebolo ibino kuba wiya uwatema: Godokono Kowo Egela kemakopelenama:^d ⁷Ega:walo modobola la: Sodomo duiyomolo epo ega:walo Gomola duiyomolo epo ega:walo ibi niyakabolo dilukulionamiya ebe iyaiya duiyomolo epo ibino tanalo atumu na:kemalagidilala:. Ibi bilibili nomine atumu Godokono pukala adikamidaliya, ma kunu ibi magumulo idite iditamo kateneno iyaiya kuba ubi tanalo osiyodilolenakiya. Ebe mabuma: Godote ibino kuba wiya iba:tamo ikalamiya, ebene me tetelo iba:te a:ega: ela magumulo kawo temeteme iyatawaona. Me mabuma: piyate me tetelo kuba osiyodilole magumulo dilukuliona, modobola iba:te ebe epono temeteme tanalo eba malagidilolo wadewade woki nuwatema:na: iba:te atu kuba wiya lawekapoma:^e

⁸Ebema: piyate diya gabodo la: magumamo da:popila:iya, ebe dubate atumu ibino kateneno kuba osiyodilole ubi gabodo ibino ape ebo kubailamenaka. Ega:walo iba:te Godotamo tudila:oma: ubia:noma: eda:olo Unu Duiyomolono nopopi ebo malogolenaka, mabu ebako amama wokino tanalate iba:tamo iyolo maimionaka. ⁹Wiyasiya modobola la:le Unu Duiyomolono nopopino Elawodubu Maikolokono tanalo nemalagidilala:, ebeno elawo kawonomola wiyasiya ebete ebe tanaloma: kamamana:. Ebema: kebe tetelo ebete Mosesekono a:e ape laema: Saitanago dapamineateuiya, ebe tetelo ebete Saitanatamo malogo tabo idi gea:no negiya, “Kawodawa Godote a:ka:tuwa: ebeno tabamo a:ma: kodiyoboma:ta, wiyasiya naimano elawamo nale a:ma:tamo tanalo idi a:kosiyodilomo!”^f ¹⁰Wiyasiya la: magumulo da:pola:na ebe dubuno tanalo eba kunua:. Iba:te Unu Duiyomolono iyaiya tanalo iyatawa:, ebema: iba:te ebe duiyomolono nopopino tanaloma: ibi malogole tabo gelana. Eiye! Iba:te kapiya tanalo iyatawanomola, ebe tanalo ebe me opono kateneno wapata:lame gabola, iyo, ibi tumu goeogoe keba kunula:ka: eba kunula mabu iba:te wade wokia:no gito

^b 3-4 Gal 2:4; 2Pit 2:1 ^c 5 Maimi 12:51; Nabas 14:29-30 ^d 6 2Pit 2:4 ^e 7 W Mabu 18:16-19:29; 2Pit 2:6,10 ^f 9 Da:n 10:13,21; 12:1; 2Pit 2:11; Awo 12:7; Sek 3:2

ilukuliona! Ebema: numa:la:, ibino kateneno ubi tanalate ibi nanitabolo kanakapulaema:na:^g

¹¹Iyo, Godote ibino kuba wiya iba:tamo dikalaemene ebe kuba wiya kawonomoma: keda:mene, mabu iba:te Ka:inikono gabodo tolame iyalo owagilimiya. Ega:walo ibi Ba:ilamako keba kunula:ka: eba kunula, iba:te mani kawonomomo malagidilolo kawokawo kuba tanalo ebo osiyodilolenaka. Ega:walo ibi Kolako keba kunula:ka: ebako epoma: eda:on, ma kunu iba:te Godotamo tudila:oma: ubia:nola, ebema: nanitabola, Godote Kolakono kuba mabuma: ebe keba kunu kanakapumiyle, ebete ibi atumu kopoliyadigalemene.^{h i}

¹²Numa:la:, la: nanitabokobi midipino aladabuti soliyomu bae nao tetelo, ebe dubuno tanalo wadewade bae magumulo da:pola:na ebe kuba sosowa keba kunula:ka: eba kunula, mabu bae nao magumulo ilipoa:nola, iyo, ibi a:ka:tuwa: ibi kapiya malagidilolena. Ebema: opote gagalema: deda:, ebe tetelo awate dowadaenako ebe temate gito ka:petolaema:na: wiyasiya ulamate a:kowomene, ebe dubu ibi eba kunula mabu iba:te epatamo giba kikalamanenakoa:. Ega:walo ebe dubu ibi noloa: da:imi kewala, mabu kawo siyelete da:pemene ibino dolodolo da:pemagobelelaemene damelamo gito ka:piyalekemene, iyo, ibino igilate eba kunu olopoligonomo kolopoligoma:na:^j ¹³Ebema: netewa uli tabo epetapi ebe dubuno tanalo awokalima: ba:pola:na. Dopo uli tabono tanalo ma kunula, ebe dubuno ilipo osiyodilole tanalo ebe kawokawo ulate ununomamo demaimionaka eba kunula, ega:walo uli tabo idi ma kunu itana, ebe dubu ibi idoko magumulo kalawikalawilo dowapata:lamena ebe mawele keba kunula:ka: eba kunula. Ebema: Godote ibi mabuma: kebe idoko bobo kawonomo iyalo dosiyodilolamiya, ebete ibi ebamo kanalibolemene iba:te uwomua: tetelo ebolo temetema:go ka:nilukulionama:.

¹⁴Numa:la:, A:da:mekono walone gudi bilibilinomo magumulo Inokote sebeni atu alailameno dopo dubu guduma: ediya, ega:walo ebe Godokono woki awokalimidawa idila. Ebema: me Inokote ebe kuba dubuno tanaloma: iyalo tetelo ma kunu giya, “Numa:la:, Kawodawa Godote ebeno talena nopopi bilibilinomago pete,^k ¹⁵ebete me opo epono tanalo bilibilinomo eba panagilamelelamele ebeno ubi tanalamo tudila:oa: epatamo kuba wiya ka:pikalaemene. Iyo, iba:te Godotamo kebe kubakuba tanalo dosiyodilolenaka ega:walo ebetamo kebe kuba

^g 10 2Pit 2:12 ^h Buka ka:la:mioledawa, a:ma: Ka:inikono tanalo iyatawama: dowagela:emene, modobola a:ma: Wagilamole Mabu Buka 4:1-16 numiye. Ega:walo a:ma: Ba:ilamakono tanalo iyatawama: dowagela:emene, modobola a:ma: Nabas Ka:la:miole 22:1-25:9 na:kumiye. Ega:walo a:ma: Kolakono tanalo iyatawama: dowagela:emene, modobola a:ma: Nabas Ka:la:miole 16:1-50 na:kumiye. ⁱ 11 1Yon 3:12; 2Pit 2:15

^j 12 2Pit 2:13,17 ^k 14 W Mabu 5:18,21-24

tabo degelanaka, ebe iyaiya tanaloma: kuba wibate iba:tamo nanitabolo ka:pemene.”¹⁶ Ebema: modobola la: me kuba osiyodilolepino tanalo wadenomamo niyatawala. Iba:godolo ubia: tabo gela kawonomola, ega:walo ibi a:ka:tuwa: ibino kuba ulamea:no epo etepati kubakubapima: ka:la:minaka. Iba:te ibino kateneno ubi gabodo wapata:laema: elawoelawonomola, ega:walo ibi a:ka:tuwa: ibi walogolelo lumagi idi a:da: elemasigi gabodo demoiooma:na:, ebe tetelo iba:te ubi niyatina ibino tabo kiyawao tanalodo ebegodone wade tanalo idi gito kelaema:.

**Yudate Nanitabokobi Midipi Elawokobi
Midilima: Iyaiya Tabo Da:kiyawaiya**

¹⁷ Ebema: naimano wadewade namutupiala:, Kawodawa Ya:su Kelisokono alibolepi dubate la: dopamo danaletiyala, modobola la: ebe tabo walo wadenomamo na:kemalagidilala:. ¹⁸ Iba:te la:tamo ma kunu geliya, “Uwomu tetelo kubakubapiate Godokono ubi tanalomo tudila:oma: ubia:noma: eda:olo ibino kateneno ubi gabodo eba wapata:lamelo la: nanitabokobi midipi kekalakalatelema:ta.”¹⁹ Numa:la:, Ya:sukono alibolepino tabo nanitabola. Me kuba osiyodilolepi ibi la:imano taneba magumulo anagiyamida tanalo dosiyodilona me ebe epola, iyo, iba:te ibino kateneno ubi tanalomo eba tudila:olo, Godokono Uliyanate ibi magumulo kokolina:.

²⁰ Ebema: naimano wadewade namutupiala:, modobola la: la:imano nanitabokobi midi tanalo talenanomoma: gelawete kodakodal eba lawelo ebo napapeonala:, ega:walo la: Godokono Uliyanano elawamo ebetamo na:towetoweonala:.^m ²¹ Ebene la:le Godokono nilakapo kimalagidilo magumulo dilukulianiwenama, ebe tanalo atepa:no Kawodawa Ya:su Kelisokono pe tanalo nemakopelenala:. Nanitabola, ebete da:pemene la:le kebe kubakuba tanalo kosiyodilola:wenakima, ebe ebe kuba bilibilinomo egebolelame tabo pa:kiyawaoe uwomou: igilo la:tamo ebo ka:pikalaema:ta.

²² Ebema: nanitabokobi midi magumulo piyate kodakodal lamota:ona:no woki netewama: deda:onaka, la: ibi nilakapol eba malagidilolelo ibi nowalubiliala:, ²³ iyo, me modobo tete eba itanalo, modobola la: ibi Saitanakono ela magumune samonomamo nowagailiala:, iba:te ibino igilo mula: tanalo Ya:sugodone kelaema:. Ega:walo modobola la: kuba osiyodilolepi etepati atumu nilakapol eba malagidilolelo na:kowalubila:la:. Wiyasiya la: nanisiwale, ibi eba walubililo ibino iyaiya kuba osiyodilole tanalo kawokawoa:ma: a:kegelaema! Numa:la:, iba:te ibino kateneno kuba ubilo dosiyodilolenaka, ebe tanalo ebe ibino pupuliono inamabu keba kunula:ka: eba kunula, ebema: modobola la:

¹ 18 2Pit 3:3 ^m 20 Kol 2:7

ebe daleyago kaliku ubia:noma: eda:olo la:imano kotamo ako-ologiola:la:, ibino kuba daleya tanalote la:tamo pekapoma:."ⁿ

Yudate Leta Uwomu Apulo Godoko Moio Tabo Da:kiyawaiya

²⁴O nanitabokobi midipiala:, aimano Wade Elawodawa bokolina, ebe modobola la: eba a:ga:lulatelelo la:le a:ka:guda:ema. Nanitabola, ebete la: kubakuba:pima: midilitate, ebene kawo kalakalanomago ebete la: ebeno pukuilame ololo apuamo kemagaelema:ta. ²⁵Ebe kapiya ebe Godotela, ebete aimano Kawodawa Ya:su Kelisodo aimano Igilo Mula:leamedawama: eda:na. Nanitabola, ebeno amama tanalo ega:walo ebeno wade pukuilame tanalo, ebeno elawo kawonomo ega:walo ebeno kawo elawodubuno tanalo, me tanalate dopamo wagilimi mabune ebegodolo a:pola:namiya! Ebema: modobola me tetelo ega:walo uwomua: tetelo me atu tanalate ebe kapiyagodolo na:ka:pola:nama:na:!

Me naimano tabo uwomula. Taula.^o

ⁿ 23 Sek 3:2; Awo 3:4 ^o 25 Lom 16:27; 2Pit 3:18